



UDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikasu Imprensa 15 Dezembru 2023

Pesoál liña frente sira iha fronteira Batugade foin hatene kona-ba saida mak tráfiku umanu depoisde hetan formasaun hosi JSMP

Iha 05 no 06 Dezembru 2023, JSMP kontinua fasilita treinamentu kona-ba tráfiku umanu no oinsa bele uza matadalan tráfiku umanu hodi identifika, prevene no kombate tráfiku umanu ba iha liña frente sira iha Suku Batugade, Postu Administrativu Balibo, Munisípiu Bobonaro.

Treinamentu ida ne'e nu'udar parte ida hosi programa tinan rua (2) ho títulu "Prevensaun no Resposta ba Tráfiku Umanu ho Baze iha Komuidade, Responsivu ba Jéneru no Sentradu ba Sobrevivente (2023-2024)" ne'ebé finansia hosi Governu Timor-Leste liuhosi Ministériu Interiór no implementa hosi UN Women Timor-Leste ho parseria ho JSMP. Ba treinamentu dathaat nian ne'e, JSMP halo ona treinamentu ba membru komuidade membru instituisaunn relevante sira iha área fronteira hamutuk ema na'in atus ida resin ona.

"Treinamentu ida ne'e nu'udar treinamentu kontinuasaun hosi treinamentu sira anteriór sira ho objetivu atu hasa'e koñesimentu pesoa sira iha instituisaun sira liña frente no mós mobilizadór sira komuidade nian kona-ba saida mak tráfiku umanu no oinsa atu identifika, relata no halo prevensaun, nune'e mós ajuda vítima sira bainhira iha kazu ruma iha komuidade ka kualkér fatin ne'ebé sira hala'o sira nia knaar", dehan Sra. Ana Paula Marçal, Diretóra Ezekutiva JSMP

Iha abertura ba treinamentu ne'e, Sr. Jose Pereira halo introdusaun badak kona-ba JSMP ho nia serbisu no projetu ho nia objetivu sira. Sr. Jose esplika katak projetu ne'e Governu Timor-Leste nian liuhosi orsamentu Ministériu Interiór, ne'ebé UN Women ho JSMP nu'udar parseiru implementadór. Nia hatutan tan katak treinamentu ne'e la'ós primeiravés halo iha Batugade, maibé antes ne'e halo ona no treinamentu ne'e ba faze dala haat ona. Treinamentu ikus ne'e mak fokus liu ba pesoál liña frente sira, tanba importante tebes atu sira iha informasaun natoon kona-ba tráfiku umanu nune'e bele tulun sira atu hala'o sira-nia knaar ho di'ak liután, tanba área fronteira sai hanesan fatin ne'ebé risku aas ba tráfiku umanu.

Liután, Sr. Jose Pereira hato'o katak treinamentu ne'e bele tulun pesoál liña frente sira atu bele hatene oinsa mak atu identifika kazu tráfiku umanu, oinsa mak atu relata no tulun vítima sira no oinsa mak atu prevene krime ne'e la bele akontese. Nune'e husu ba partisipante sira atu tuir treinamentu ne'e ho di'ak, nune'e depoisde treinamentu ne'e bele implementa no prevene krime tráfiku umanu.

Alende ne'e representante Xefe Suku Batugade Sr. João Talo, hanesan mós lia na'in iha ninia abertura ba treinamentu ne'e agradese ba JSMP tanba hili ona Suku

Batugade atu sai mós hanesan suku seluk ne'ebé hetan formasaun hosi JSMP. Hanesan mós estrutura suku ne'ebé mak foin eleitu konsidera informasaun ne'e foun no importante tebes, nune'e husu ba partisipante sira atu rona didi'ak matéria ne'ebé sei fahe hosi JSMP.

Iha sesaun apresentasaun, atu asegura partisipante sira bele participa ho ativamente iha treinamentu ne'e, fasilitadór uza mekanizmu diskusaun no apresentasaun iha grupu. Tópiku sira ne'ebé koloka iha diskusaun no apresentasaun grupu ne'e mak kona-ba saida mak tráfiku umanu no nia elementu sira, oinsa atu bele identifika no relata. Alende ne'e, partisipante sira halo diskusaun ba estudu kazu sira relasiona ho kazu tráfiku umanu iha grupu no halo apresentasaun.

Iha sesaun pergunta nian, partisipante sira foti kestaun sira kona-ba timoroan balun halo rekrutamentu ba sidadaun Indonézia hodi mai serbisu iha Timor, iha inísiu rekrutamentu ne'e atu mai serbisu iha restaurante, maibé depoisde to'o iha Timor halo fali serbisu seluk, ne'e bele dehan tráfiku umanu ka lae no durante ne'e iha ona dadus ba kazu hanesan ne'e ka lae. Pergunta seluk relasiona ho rezultadu monitorizasaun JSMP nian ba kazu tráfiku umanu. Saida mak ita presija halo hodi prevene krime tráfiku umanu labele akontese iha ita ninia rai. Saida mak ita presija halo bainhira ita identifika katak ema ne'e vítima hosi tráfiku umanu, maibé bainhira ita atu ajuda, vítima dehan katak nia sente di'ak hela.

Hatan ba kestaun ne'e, fasilitadór JSMP nian esplika katak kazu tráfiku umanu bele identifika liuhosi nia elementu sira mak hanesan asaun ka atividade, meu no objetivu. Iha kazu ida timoroan rekruta sidadaun Indonéziu hodi lori mai serbisu iha Timor-Leste, bele konsidera hanesan tráfiku umanu bainhira prienxe ona elementu sira tráfiku umanu nian katak iha atividade rekrutamentu, transportasaun, fraude ka bosok ho objetivu hetan lukru ka benefísiu. Bainhira ema timoroan ne'e ho meu bosok hodi rekruta no transporta ema indonéziu ne'e mai iha Timor-Leste hodi halo fali serbisu la tuir kontratu no hetan benefísiu hosi ne'e, bele konsidera hanesan tráfiku umanu.

Hatan ba kestaun dadus kona-ba tráfiku umanu, fasilitadór JSMP hateten katak iha JSMP nia monitorizasaun ba iha tribunál sira, iha kazu balun ne'ebé tama iha kategoria tráfiku umanu no kazu sira ne'e la'ós de'it kazu sira hakat fronteira, maibé iha kazu lokál mós. Kestaun kona-ba saida mak presiza halo hodi prevene mak tenke habelar informasaun no hasa'e ema nia koñesimentu kona-ba tráfiku umanu ho nia *modus operandi* sira, nune'e, comunidade sira labele monu arbiru ba lasu trafikante sira nian no mós bele relata ka hato'o keixa bainhira kazu ne'e akontese iha sira nia leet, liuliu vítima sira.

Partisipante iha treinamentu ne'e hamutuk ema na'in 20 ne'ebé kompostu hosi pesoál hosi Imigarasaun na'in 1, UPF na'in 1, DNTT na'in 1, UMP na'in 1, Bombeiros na'in 2, Profesór/a na'in 2, representa igreja na'in 1, lia na'in na'in 1, PASS 1, xefe juventude na'in 1 no mobilizadór comunidade suku Batugade na'in 8.

Atu hetan informasaun liután favór kontaktu

Sra. Ana Paula Marçal
Diretora Ezekutiva JSMP
Diresaun e-mail: ana@jsmp.tl
Website: <http://jsmp.tl>